

【经文信息】大正藏第 14 册 No. 0528

佛说菩萨逝经 1 卷

No. 528 [Nos. 526, 527]

佛说菩萨逝经

西晋沙门白法祖译

佛在鹞山中，与诸比丘五百人，皆阿罗汉，平旦皆着衣持钵，入城各行求食。

时，城中有一豪富长者，国中第一所居，高燥舍宅楼观甚好，垣墙周匝七重门，字檀尼加柰。檀尼加柰有子，字逝，年十六。檀尼加柰歿故，逝独与母居。

佛到檀尼加柰家求食。时，逝在内第三门中住。遥见佛来欢喜，逝即心念言：「是人何以端正无比好乃尔？好如明月珠，光明如日月，其色如黄金，好如月十五日盛满。」

时佛到，住于门外。逝便走入，语其母言：「我见一人来，大端正好，天下无有辈，我生以来未尝见人如是，今在门外住，欲求食。」逝语其母言：「我当与之。」

其母大慳贪不肯与，逝语其母言：「夫天下人慳贪无益于身，是非恒人，当与之。」

母复不应，逝复语母言：「是人过度天下之师也，与是人者如病者得善医。」

逝语母言：「当用我故与之，是人名闻于天下，今续在门外住。」

其母复不肯与，逝数语母，母大瞋恚语逝言：「汝烧我不止者令我烦乱，是人不用食故来，但欲调若耳，若小儿当何等知？若所索不止，会得我捶杖乃止。」

佛豫知母慳贪，佛放威神彻照七重门内，逝见佛光明心即开解。逝即复到母所，语其母言：「愚人不知布施，譬如盲人堕于火中，其人但坐盲无目故耳。世间人但坐慳贪，心念恶、口言恶、身行恶，愚人不信于佛、不信于经，死后皆入地狱畜生鬼神中。人不慳贪，身行善、口言善、心念善，续自得其福，人有智者当供养饭食佛，人常当与智者相随令人有知。」

逝语母言：「不肯与者，自持我今日饭分来，我今日不食，自持我分与之，哀疾持我分来，我恐是人便弃我去，是人难得值。」

母复不肯与，逝便自往取饭及所著细好褰衣，持出至佛所前，以头面着佛足，却住叉手，白佛言：「持我所有衣被、饭食，愿上佛。」佛默然不应。逝复白佛言：「今佛是天下人之父母，当度脱我曹。哀为受之，当令我得其福。」如是者三。佛便受逝衣被饭食，逝大欢喜。

佛语逝言：「诸慳贪者若皆伏之，若今日施佛衣被、饭食，使若得心中所愿。」

逝大欢喜，复白佛言：「我心亦不愿作第二忉利天王释，亦不愿梵天，亦不愿世间豪贵，愿使我光明智慧如佛。」

佛言：「大善！若心所愿皆得之。」

天王释闻逝言，即在佛后叉手住，释于佛前语逝言：「若欲求作佛者甚难得，十劫、百劫、千劫、万劫、亿劫尚未能得佛，今汝持小饭食、衣被与佛，汝便欲作佛，不可得也。」

释复语逝言：「若持四宝如须弥山布施，复慈心念天下，十万劫、百万劫、千万劫，若尚未能得佛。」

逝报释言：「譬如工师持斧入山斫树木，会当索取好直可意，乃取耳。」逝语释言：「我亦不用一饭食、衣被与佛，故欲得作佛也。我常持善心、精进思惟不懈，会当得佛。」

释复报逝言：「若欲求佛勤苦，不如求梵释天也。」

逝复报释言：「若见阎浮利内，悉令满其中火上至天，持我身投其中，会求作佛终不止。」

释报言：「若令阎浮利内满其中火，是中有人民、畜生及蜎蜚蠕动之类，汝不当杀之，汝反心念恶，当入地狱中，汝当那得佛？」

逝复报言：「世间人民及蜎蜚蠕动之类，我持慈心皆付弥勒佛，弥勒佛自当度脱之，我求佛道会不止。」

逝复语释言：「梵天王虽尊，会归无常，无有脱于死者。」

释便叉手，报逝言：「卿持心志坚，乃念欲求佛不止，卿亦会当得佛。」

逝复报释言：「若莫恃天上自贡高，复有胜若者。」

逝言：「我持慈心精进不懈求佛者，会当得作佛。」释便默然，无所复语。

佛便语逝言：「汝前后所供养饭食凡六万佛，汝心常愿欲作佛，汝常持善心供养于佛。」

佛语逝言：「却后二百万亿劫，汝不复更地狱、畜生、鬼神中。」

佛复语逝言：「汝常持慈心供养佛，若后当作金轮王，当有十亿小国王皆属，若当领四天下常当飞行，所行皆正，寿尽当生梵天及兜术天上。天上寿尽，当复下生作金轮王，寿尽当复上生梵天，如是上下二百万亿劫竟，汝当作佛字须弥加罗，度脱天上、天下人民。若生堕地，光明当照三千须弥山，上至二十八天，天地皆为震动，昼夜皆明。时人皆寿七千亿岁，若身当长二百丈，当有万二千城，城皆四百八十里，城门皆着刻镂皆七宝。

「若为佛时，当再会诸沙门说经。第一会说经时，六千亿沙门皆得阿罗汉道；第二会说经时，四千亿沙门皆得阿罗汉道。当尔时，人民无有偷盗者，男子女人皆同一心，人民无有作恶者，诸恶道勤苦之处皆闭塞，亦无有山林溪谷，地皆平正。人民无有疾病、无有忧苦，人民皆快乐，所居皆自守，天日三雨纔淹尘，人民欲所议语皆相聚会，夏月不大热，冬月不大寒适得其中。」

「所讲授精舍名难提陀，若有人布施与佛阿罗汉，欲求作佛、辟支佛、阿罗汉皆可得。佛道不可不求，佛智不可称量，十方无穷极，佛智亦如是，无有穷极，天下人不知生从何所来，亦不知死趣何道。」

佛说经已，逝及诸比丘、天王释，皆为佛作礼。

佛说菩萨逝经

【经文信息】大正藏第 14 册 No. 0528 佛说菩萨逝经

【版本记录】CBETA 电子佛典 Rev. 1.9 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
